

23. ՄԻՐՁԱ ՄԱՀՄՈՒՏԻ ՀԵՔԻԱԹԸ

Վախտի մեկին ապրում էին մեկ աղքատ մարդ ու կնիկ՝ Աստուծոյ մարդուն էրեխա չի տալում, Գալում էխթիարնում են, վախտերը անցնում է ու էրեխա սոնդ չի էղնում:

Ամեն օր նստում են էտ աղքատ էխթիար մարդ ու կնիկ իրանց սե դարդն են լալում թե.— Մենք էս մեր ըխթիար վախտ ինչը՞ խ պտի ապրինք:

— Աստու դիվնին մեռնիմ,— ասում է կնիկը,— հեշ որ չէ, մեկ աղչիկ տար, հիմի էրթար հաց թոփ էներ, բերեր մեզի պահեր, յա թե չէ տնփեսա կուտաինք մի տղի, մեզի էս ըխթիար վախտ կը պահերն, ինչունի հողը մտնեինք:

— Այ կնիկ,— ասում է մարդը,— ի՞նչ էս դարդ անում, հալբաթ էն ողորմած աստուծոյ, որ մեզի էս օրն է հասուցեր, կարա մեզի մի ճար էլ անել: Աստուծոյ հո՞ւմն է անոթի մեռուցեր, որ մեզի մեռցընել էլի աստուծոյ ողորմած է, հալբաթ մեզի էլ մի դուռ բաց կոնել:

Մի հորիկուն էսենց մարդ ու կնիկ նստել իրանց սե դարդն էին լալում, մտածում են, թե. «Մեր սոնդը մո՞նց կրլլի»: էտ խոսալու, մտածելու վախտ բիրդան էտոնց ալաչուխը մտնում է մեկ վիշապ օձ: Մարդ ու կնիկ որ տեսնում են, թուք մուք բերններու մեշ չորանում է, թե՛ «Վալլահ էս վիշապ էկալ մեզի կուլ պտի տա»:

Վիշապը հեշ բան չի ասում, քաշվում էրթում է մի քոշեն իրա համար կուծուծվում է:

Ըխթիար մարդ ու կնիկ հուզում են տնից հօնին փախնին, տունը տան էտ վիշապին, բալքի ազատվին ու շեն կարող, կոսես թե մի բան, մի ահ, էտ մարդկանց կապել չի թողում տեղից ժաժ գան: էսենց ահուքնեբուց շոր փետ էին գառեր տեղն ու տեղ, ձեն չկար:

Մե խելի էսենց մնացին, վերջ մարդը քիչ ուժ ու կող արեց, յավաշ փըսըրտաց, էնենց որ վիշապը չը լսե.— Այ կնիկ, յազո՞ւզ ենք վախենում, հազըր մենք ասսուց խնդրում էինք, որ մեզի էս նեղութունից ազատե, իշթա պտի ազատե, էս վիշապին հրաման է տվեր, էկավ մեզի կուլ տա: Լավ կէղնի էս գեշ օրերեն կազատվինք: Ի՞նչ է մեր քաշածը, մեռնիմ ասսու սրտին, երեխա շունինք, քասիբ, ինչունի հիբկուն հալղի դռներն ենք ման գալում, որ ինչ է, մի կտոր շոր հաց տան իրանց խեբուն, էն էլ հազար մունաթով, քիթ ու մըռթով, որը լավ է ասում, որը գեշ, որը աստուծ տա է ասում, որն էլ ծիծաղում, խոլասա, մեր տեսած օրը օր չէ, լավն էն է որ մեռնինք ազատվինք:

Մարգ ու կնիկ էսենց իրարու հետ յավաշ խոսում էին. «Հա՛, հիմի վիշապը գելնի մեզի կուլ կը տա, հա՛, քիչ հետեա, էսենցով գիշեր անցնում էր, ու օձ վիշապը իսկի տեղից ժաժ չէր գալում: Ըխթիար մարդ ու կնիկն էլ ահեկուն սաղ գիշեր աչքերուն քուն չէկավ, էնենց բաց աչքով լուս հելան:

Աղոթրանը ծեքեց, օձ վիշապը յավաշ հելավ տեղից, որ էրթա գուրս, մարդ ու կնիկ ահու տեղոց տեղ ցմբան:

— Վալլա, հա,— ըսին,— էս ա հելավ մեզի կուլ պտի տա:

Ամա օձը իսկի տերն էլ չէղավ, քաշվավ էկավ, գնաց դուրս:

Էստեղ նոր երկու ըխթիարները քիչ սոլուղ առան, նոր պարկան քիչ քնելու, որ դինջանան հօնին էրթան իրանց հմար քիչ հաց, բան թոփ էնեն, բերեն ուտելու:

Ըխթիարները որ քիչ քնան, հանգստացան, հելան գնացին քաղքի մեշ հաց ժողվելու էտոնց տունը քաղքից դուրս էր: Քաղաքն որ գնացին, հալղ էտոնց հերեսի ունգ որ տեսան, զարմացան թե, էս մարդիկ գերեզմանից են քաշած հանած էղնին: Հա՛, հալղը տեսան, համա ո՞ւմ դարտն էր կռեր, թե էտ քասիբների հալը հարցնեին: Ըխթիար մարդ ու կնիկ էլ հուզում էին հալղին հայտնել օձ-վիշապի մասին, էլի վախենում էին, թե հլա սպասենք, աշենք թե ինչըխ կըլի:

Ինչունի հիբկուն ման էկան: Ամեն օրվա պես հաց, բան թոփ արին էկան տուն, համա էլի ահը սրտերուն էր, թե. «Աճապ էլի՞ վի-

շապը պտի գա թե չէ: Մութը հ'ընկավ թե չէ, էլի օձ վիշապը սողալով ներս մտավ, գնաց էլի իրան տեղ էն քոշեն կուծուծվավ: Էտ օր ըխթիարները էլ էնքան չեն վախենում, հ'իմանում են, որ իրանց վնաս տալող օձ չէ: Էտ օր էլ էտենց անցնում է: Գիշերը լուսանում է, սարախտան օձ վիշապը էլի քաշվում, տնից էրթում է:

Մարդը վերցնում ասում է.— Ա՛յ կնիկ, էս ինչըխ բան է, ըստուր մեջ մի բան կա, հմա աշենք թե ի՞նչ է: Թե որ հալղին, մեր դրկիցներին ասենք, դու արի տես որ գա մեղի կուլ տա, թե շասենք, ըստուր մեջ մե գաղտնիքմ կա: Ես մեր մեծերից իմացել եմ, որ ասում էին. «Թե որ մարդու տուն օձ մտնի ու զիան չտա, էն օձը խերով է, ընտոր վրեն, որ մարդ իր շորերից հանե քցե, յա մարդ է դառնում, յա խազնա: Ես էսենց եմ ասում, որ էլ հեշ մեկին էլ բան շասենք, հ'եսօր էլ որ էկավ, ես կը հանեմ իմ փոխանս կը քցեմ օձի վրեն, ինչ գալում է, թող գա:

Էտ օր էլ, էլի գնացին քաղթի մեջ իրանց հմար ողորմութուն թոփ անելու, ինչունի հ'իրկուն ման էկան, հ'իրկուն արեն օր մեր մտավ, դառան էկան տուն, դուռը բացին ներս մտան, դինշացան, իրանց ճրագը վառին՝ որ մութը հ'ընկավ: Քիչ իրանց հմար հաց, բան կերան: Ամեն օր վախենում էին օձից, հ'եսօր, գիտես թե օձի ճամբեն են աշում: Օձի գալու վախտը որ էկավ, մեկ էլ աշեցին որ, էլի օձը ներս մտավ, գնաց իր տեղ, քոշեն կուծուծվավ: Մարդը հանեց իր փոխան, էլ չը վախեցավ, տարավ դուռը քցեց օձի վրեն: Մարդ փոխան որ քցեց օձի վրեն, մեկ էլ աշեց, փաթ տրաքվավ օձի կաշին, էսենց ձեն տվեց, որ քիչ մնաց խեղճի ալաչուխը բլեր: Օձի կաշին պատռավ թե չէ, միջեն մի սիրուն դալիղանլի տղա դուրս հ'ելավ որ օխտն օր չ'ուտես, չ'խմես, սեյր անես:

Մարդ ու կնիկ էնենց վախեցան, հետ թռան.

— Ի՞նչ եք վախենում,— ասում է տղեն,— Դուք շատ ասսուց աղաչանք, պաղատանք արիք, աստուծ խեղճ էկավ ձեզի, ընձի տղա տվեց ձեզի, ըստից հետև դուք կէղնիք իմ ծնողներ, ես ձեր ըստեր զավակ: Համա մի բան ասեմ՝ չըլլիմ, չիմանամ, որ մեր սըռը ուրիշ մարդու ասեք, թե որ ասեցիք, ես որ կէրթամ կը կորիմ, էլ ընձի չեք կարա գտնիլ:

Մարդ ու կնիկ աղոթք արին, ասսուն փառք տվին, որ իրանց էս նեղութունից ազատեց:

— Լավ տեսա՛ր, այ կնիկ, ես չէի ասում, թե աստուծ ողորմած է, էնոր համար չաթին բան չկա: Դու դատիմի գանգատ էիր անում, թե մեղի զավակ աստուծ չըտվեց: Տեսա՛ր աստուծ մեր էս ըխթիար

վախտերուս ինչը իս ողորմած, մի հասած, կատարած տղա տվեց:

Անցավ մի քանի վախտ, տղեն տնից դուրս չէր հ'ելնում: Հերն ու մերն էլ հալղին օնչիչ չէին ասում: Մինակ, հալղ աշում տեսնում էին, որ էս ըխթիարները հառաջ նիաթներ արած, ինչը իս մեռած մարդ, հիմի շատ ուրախ են ման դալում, ինչը իս թե թագա, ջահել, ու հեչ մեկը չէր կարա բան հասկնալ:

Մի քանի օր որ անցեր էր մե հ'իրիկուն տղեն հորն ասում է.—
Հայրիկ, առավոտ վաղով կէրթաս թագավորի աղջիկ ընծի կ'ուզես:

— Օրթի, էդ ի՞նչ ես ասում, մեր օրը մեզի հերիք չէ, մեր քասիրութուն, մեր դարդ ու ցավը, մենք մեզի ուտելու հաց չենք կարա գտնի, մենք մո՞նց էրթանք թագավորի աղջիկ հ'ուզենք, հալղ ի՞նչ կոսեն մեզի: Մենք ինչունի հ'իրկուն դռներից հաց ենք թոփ անում, հիմի էրթանք թագավորի աղջիկ հ'ուզենք, դու սազ քաղաք մեր վրեն պտի խնդացնես: Կարգվել ես հ'ուզում, էրթամ մեր լման մե աղքատ քասիրի աղջիկ հ'ուզեմ: Ես յաղո՞ւղ եմ էրթում թագավորի դուռ կայնում, որ անպատիվ էղնիմ:

— Զի ըլի, որ չի ըլի, ես թագավորի աղջիկ պտի առնիմ: Ես քեզ կոսեմ, դու գնա, անպատիվ չես էղնում, քու ինչ բան է:

Հ'եզսի օր, առավոտ, խեղճ ըխթիարը աշում է որ էլ իլլաճ չ'կա, հ'ելնում էրթում է: Էրթում է ու ճամբեն իրան իրան մտածում. ճեսենց էլ բան էղնի, ես մո՞նց էրթամ թագավորից բարեկամութուն խնթրեմ, էս ըխթիար վախտս, մե լավ էլ ծեծեն, անպատիվ են: Ինչ անեմ, շարեն ինչ, աստուծ էս ըխթիար վախտս որ ընծի տղա տվեց, ես մո՞նց էնոր սիրտը կոտրամ:

Էրթում հասնում է թագավորի դուռ, զարաղուններ գալում են հ'առաջ կռում թե.— Ի՞նչ ես ասում:

— Ես թագավորի հետ գործ ունիմ, ընծի թող տվեք ես ներս էրթամ:

— Դու ի՞նչ ունիս թագավորի հետ, այ հարիֆ, ժողովք ես անում, առ քեղի էսքանի կոպեկ, դառի գնա:— Մի քանիսն էլ ծիծաղում էր, ուշունց էին տալում դես ու դեն:

Ըխթիարը սալթ կեցած յալվար է հ'ընկնում, որ իրան բաց թողնին էրթա թագավորի մոտ:

Դռան դալմադալը ներսից թագավոր լսում է: Մարդ է զրկում թե. ճաշեք էտ ինչ դալմադալ է:

Ղարաղուններից մեկը գալում աշում է, որ մի աղքատ մուրացկան, որ յալվար է հ'ընկնում դռան զարաղուններին թե. ճընծի բաց թողեք էրթամ թագավորի մոտ բան ունիմ ասելու:

Մահան էրթում թագավորին ասում է, որ մեկ աղքատ ըխթիար
հ'ուզում է թագավորին տեսնել:

Թագավոր հրաման է տալում, որ ներս թողեն:

Ըխթիարը ներս է մտնում, էրթում է, խնամաթոռքի վրեն նըս-
տում է:

Թագավոր աշում տեսնում է ու գլուխը պտտցնում թե. «էս ին-
չըխ բան է, մի աղքատ քասիր մարդ գա ու թագավորի խնամաթոռ-
քին վրա նստի, յա էս մարդը խելար է, յա մի բանըմ կա»:

Թագավոր կանչում է էտ մարդուն ու ասում է.— Ա՛յ մարդ,
դու մի քասիր մարդ, յաղո՞ւզ էկար խնամաթոռքի վրեն նստար, դու
չե՞ս հ'իմանում, որ էտ աթոռի վրեն էն մարդ կարա նստել, որ թա-
գավորի աղջիկն է հ'ուզում: Դու թե խերիաթ էիր հ'ուզում, դարա-
ղուներին կարայիր ասել, թե գանգատ ունեիր, քաղքի մեջ դատա-
վոր կա, էս ի՞նչըխ բան է:

— Թագավոր ապրած կենա, էտոնք հեշ մեկն էլ իմ հ'ուզած-
ներ չեն, ես էկեր եմ աստծու օրենքով քու աղջիկը հ'ուզեմ պտի իմ
տղին: էտոր հմար էլ խնամաթոռքի վրեն նստա:

Թագավոր գլուխ կախում, խելի մտածում է ու մտածում է, հեշ
չի հ'իմանում, թե ինչ անե: Հետո վերցնում ասում է.— Ըխթիար, ես
իմ աղջիկը քու տղին կտամ, քեզի իրեք բան կոսեմ, թե արեցիր,
ագջիկս կտամ, թե չ'արեցիր, քու գլուխն էլ ու քու տղինն էլ զարնել
կուտամ: Մեկ որ՝ հ'եզուց առավոտ, էն իմ մաշինի ջաղաց որ կա,
էնոր մոտ մի լավ ջաղաց քեզնից կ'ուզեմ, դեմ յոթ ջաղջի քար մեջ
դառնա, էնենց որ իմինիցս լավ էղնի, կարացիր շինել՝ դաթի լավ,
չկարացիր՝ գլուխդ կէրթա:

էտ աղքատ մարդը հ'ելնում, գալում է տուն: Ճամբին իրան
իրան մտածում է. «Ըշթը իմ հախս էլ էս էղավ, որ հ'եզուց թագա-
վոր իմ գլուխ պտի կռե: Զտթի լավ էլ կէղնի, որ ես գեշ օրից կազա-
տիմա: էսենց մտածելով գալում հասնում է տուն, որ տղեն ու կնիկ
իրան են բաքլայում:

— Ի՞նչըխ արիր հայրիկ, ընչի՞ ես էտենց նիաթներդ կախած:

— Է՛հ, օրթի, ախր ես քեզի հ'ավաշտուց ասի, թե գործ չունիս,
մեր ի՞նչ հախս է թագավորի հետ նստել, կայնել, մենք թագավորի
լայեղ մարդ չենք: Աղքատը իր թավուր մարդու հետ պետք է նստի
կայնի: Օգուտն էն էղավ, որ հ'եզուց թագավոր գլուխս կը կռե, ես
էլ կը պրծնիմ, դուք էլ:

— Զանըմ, քեզի ի՞նչ ըսավ թագավոր, որ դու էտքան էլ վա-
խենում ես, մե ասե աշեմ է՛:

— Ի՞նչ ըստ'վ, Թագավոր ըստում է, թե. «էս գիշեր ինչունի առավոտ իմ շաղչիս պես մի շաղաց կը շինես, մեշն էլ օխտը քար դառնա իմ շաղչից լավ, դաթի աղչիկս կտամ քու տղին, շ'շինեցիր գլուխըդ կը կռնմա: Է՛հ, մենք էս քասիրության մեջ, էն էլ մեկ գիշեր, ի՞նչըխ օխթ քարեն մի շաղաց շինենք: Գյուղ գորա, առավոտ Թագավոր իմ գլուխս պտի կռն:

— Է՛... էտոր հմար ես էտքան դարդ անում: Թագավոր ինչըխ մեկ ծանր բան է ասե, որ դու էլ էտքան վախենում ես: Արի՛, արի՛, դու էս գիշեր դինշ պառկի քնի, աստուծ օղորմած է դու ըսկի Թալաշ մի քաշե:

Քնելու վախտ էղավ, ըխթիար մարդ ու կնիկ հ'ելան պարկան քնան: Հորն ու մոր քներ որ տարավ, քնան, տղեն հ'ելավ տեղից իր մատնին պտտացուց, մեկ էլ աշեց էրկու սե արաբ հազր կայնան գիմաց:

— Հա՛, ըսա, ինչ ես հ'ուզում, շինենք թե քանդենք:

— Ձեզնից հ'ուզում եմ էս գիշեր Թագավորի շաղչի մոտ շինեք մի շաղաց, մեջ օխտը քար դառնա: Էնենց էղնի որ Թագավորի շաղչից էրկու անգամ լավ էղնի, տեսե՛ք, ինչունի սաբախտան ձեզնի հազր եմ հ'ուզում:

— Լավ, մեր գլխի վրա,— ըսին ու կորան:

Տղան էլ պառկավ, դինշ քնավ:

Գիշերը լուսանում է, առավոտվա էն լավ, սարին վախտ Թագավոր իր աղչկա հետ քոշքու սարայու վրեն ման էր գալում: Էտտեղից լավ էրեվում էր իր շաղացը: Բիրդան աչքը էն կողմ գառուց տեսավ, որ իր շաղչի մոտ մեկ Թագա շինություն է էրեվում, իրանի շինութունից տասն անգամ լավ: Թագավոր հերսոտավ կատղեց, թե.— էտ վեվ է էտ ղոջաղ մարդը, որ իմ սինոռի մեջ իրա հմար շինութուն շինե:

Թագավորը մոռցել էր, որ ինք հ'երեկ աղքտին ըսավ թե. «Իմ շաղչի մոտ մի շաղաց պտի շինես»:

Կանչեց Լալին ու ըսավ.— Լալա, էս սհաթին կէրթաս կհ'իմանաս գես, թե էտ վեվ է, ինչ մարդ է:

Ըխթիարն էլ առավոտ շուտ հ'ելավ աշեց, որ մի շաղաց է շինված Թագավորի շաղչի մոտ, դորթ որ էնոր շաղչից տասն անգամ լավ: Ուրախութունից էլ չհ'իմացավ թե ի՞նչ անե, հ'ելավ ու հայտե դիպա Թագավորի պալատը: Էդ վախտ գնաց հասավ Թագավորի դուռը, որ Թագավորն էլ ամր էր անում Լալին թե. «էս սհաթիս պետք է էրթաս հ'իմանաս»:

լալեն թարտիր տեսավ որ էրթար, դարադուները ներս մտան, թագավորին ըսին թե.— Թագավոր ապրած կենա, հ'երեկվա ըխթիարը էլի էկել է:

Թագավորի միտն ընկավ, որ էտ ջաղացը էտ աղքտին է, շուտ հետ կանչեց լալին, որ չէրթա: Լալեն հետ էկավ:

— Հա, լալա, նոր միտս էկավ, էտ շինությունը էս գալող աղքտի ջաղացն է, որ հ'երեկ էկած էր իմ աղջիկ հ'ուզելու էտո՞ր քոչոտ շորերի տակ շատ բան կա: Հ'երեկ ես խնդացի էտոր վրեն, համա ըստու է, էդ մարգ իմ աղջիկս պտի տանի:

Թագավոր իրավունք տվել էր, որ աղքատներս էրթա: Ղարադունեն էլ հ'ավալքու պես չը հակառակվան ըխթիարի հետ, անձեն թողին գնաց:

Պատուոված շորերով ըխթիարը գնաց դուռը էլի նստավ խնամաթոռքին:

Թագավոր ներս է կանչում ըխթիարին ու ասում է.— Այ ըխթիար մարդ, դու իմ հ'ուզած ջաղացը շինեցի՞ր:

— Շինեցի, թագավոր ապրած կենա, հ'ուզում ես մարդ դրկե թող տեսնի, թե որ քու ջաղցից էլ լավ չէղավ, իմ գլուխը կռել տուր:

— Լավ,— կոսե թագավորը,— ես քեզի երեք բան եմ խոսացեր որ անես, մեկը շինեցիր, էրկուսը մնաց, թե որ էն էրկուսն էլ շինեցիր, դաթի իմ աղջիկս տվեր եմ քու տղին, թե որ չշինեցիր՝ զաթի գլուխդ կուտամ: Հ'եգուց էս վախտ քեզնից հ'ուզում եմ մի դաթ տուն, էնենց, որ իմ էս պալատներից, քոջք ու սարայից լավ էղնի: Օթախները իմ օթախներից լավ, տան հ'առաջ խաս բաղնեն, մառմառ հավուզը մեջ, որ իմ աղջիկ հ'ելնի էրթա ման գա խաս բաղնի մեջ, գա մառմառ հավուզի պաղ ջրից խմե, լվացվի, դինչանա: Թե չը կարացիր շինել հ'եգուց քու գլուխը կը կռեմ:

Աղքատը գլուխ կախեց ու գնաց դիպա իր տուն: Տղեն ու կնիկ նստած մարդուն էին աշում, թե. «Տեսնինք, ինչ խարար է բերում»: Աշեցին որ գալում է, հմա շլինք տվածի պես, նիաթներ կախած, էնենց որ լուն հ'երեսեն հ'ընկներ քառսուն թիքա կը լիներ:

Ներս է գալում թե չէ, տղեն հարցնում է.— Ի՞նչ է եղել հայրիկ, որ էտենց նիաթներդ կախել ես, չըլի թե թագավոր քեզի բան է ասե, թե որ գեշ բան է ասե, էս սհաթիս էնոր թախտը տակն ու վրա կոնեմ:

— Էլ ի՞նչ պտի ասե որ, վաղ իմ գլուխը պտի զարնե. էնենց մի բան է հ'ուզում որ, հ'ուրտից պտի մենք կարանք դրստել: Թագավորն ասում է, որ ձես գիշերվա մեջ ձեզեն էնենց մի քոջք

սարայի տունն եմ հ'ուզում, որ իմ տներից իմ օթախներից լավ, մեշ ամեն տեսակ ղարթարանքով, պատեր թոմար խալի խալիչաներով, հ'առաջը խաս բաղչեն, մառմառ հավուզը մեշ, որ իմ աղջիկ էրթա մեշ ման գա, պաղ ջուրը խմե ու լվացվի»։ Դե՛, արի ու էս թոմար հ'ուզածներ դրստե, որ իմ գլուխ չէրթա։

— Էտոր հմա՞ր գու նիաթ-միաթգ կախել ես, գիտես թե թագավոր հ'եգուց քու գլուխը կը կռնի։ Հեշ գարգ մի անի, քու տղեն սաղ է։ Քու ի՞նչ բան է,— կոսե,— գու էլի հ'երեկ գիշերվա պես պառկի, հանգիստ քնի, աստուծ կը հոգա։

Հ'իրիկունն էղավ, հ'ելան ամեն իր տեղը մտավ պարկավ։ Ըխ-թիարներու քունը տարավ, քնան։ Տղեն զաթե բսկի քուն շուներ, տղեն տեգեն հ'ելավ, մատնու հ'ակը պտտցուց՝ էրկու արաբը դեմ քիթ կեցան։

— Հա, Միրզա Մահմուտ, ի՞նչ ես ասո՛ւմ, քանդենք թե շի-նե՛նք։

Օձից հ'ելած աղի անունը Միրզա Մահմուտ է էղնում։

— Քանդելու հեշ բան չկա, շինելու՝ շատ։ Էս գիշեր ձեզնից հ'ուզում եմ էնենց մի քոշք ու սարայով օթախներ, որ թագավորի տունը ձեր շինածի մոտ մի ալաշուխ էղնի։ Ամեն թարդիրը մեշ հագըր, պատեր թոմար խալի-խալիչա, տան հ'առջե խաս բաղչեն, մառմառ հավուզը, մեշ հագար թավուր ծաղիկներ, բոլոր բուսած։ Էլ ի՞նչ ասեմ, էնենց մի բան շինեք, որ իսկի աշխարքի մեշ չկա։

Արաբներ գացին Միրզա Մահմուտի հրաման կատարելու։ Միրզա Մահմուտն էլ յորդան քաշեց գլխին ու քնավ։

Թագավորի քունը էտ գիշեր է՛լ չտարավ թե. «Ըճապ էտ աղքատ մարդ ի՞նչ դյուզան ունի, որ էտենց բաներ է շինում։ Մեկ գիշերվա մեշ իմ ջաղցներից լավ դրստելը ղուլայ բան չէ։ Բալլու է, որ տունն էլ շինե դը»։

Սաբախտան թեզ մարդ ու կնիկ հ'ելան տեսան որ, ի՞նչ տեսնին, իրանց պզգիկ ալաշուխի տեղ, ղոշա, մե ահագին քոշք ու սարայի տուն, օթախներ թոմար խետված, պատերը խալի-խալիչա քաշած, խաս բաղչեն մառմառ հավուզով։ Էտ սիրուն շինութուն որ տեսան՝ բերներ մնաց բաց։ Սաղ քաղքի հալղը էս բանը որ տեսան՝ բերները մնաց բաց, թե էս ի՞նչ զորութուն է մեկ գիշերվա մեշ էսենց քոշք ու սարայի շինել, էնպես որ թագավորի շինութունից տաս անգամ լավ։

Թագավորն էլ իր վախտին հ'ելավ լվացվավ, ղահվա խմեց, էլի հ'ելավ իր աղջկա հետ քոշք ու սարայու վրեն, ման էր գալում, աշեց

տեսաւ որ, ի՞նչ տեսնի, մի տուն, էնենց մի տուն, որ իր թագաւորական տներ ինչըխ որ մի ալաշուխ էնոր մօտ: Արեւ որ նոր դիպեր էր էտ տան բաղաններին, պատերին ու փանջարաններին, էնենց էր պլպլում, որ կոսես թե թոմար անգին քարով է շինված:

— Հե՛յ վախ,— ասում է թագաւորը,— էտ ըխթիարը իմ աղջիկը պտի տանի:

Միրզա Մահմուտի հերը տղի ու կնկա հետ ման է գալում օթախներ, աշում տեսնում է օթախների մեջ կառավարներ, ստոլներ, պատերին թոմար պատկերներ, խալի-խալիչաներ քաշած: Էլ ըխթիարը չի սպասում, հանում թափում է իր վրայի պատռտած շորերը: Տղան բերում է հոր մեկ դաթ լավ, թագաւորավայել շորեր հագնում ու ղրկում է թագաւորի մօտ:

Թագաւորն-էլ, որ էս շինութունը տեսնում է, ման գալը թողնում, էքթում նստում է թախտին ու մտածում է թե. «Մնաց մեկ բան, էն էլ ի՞նչ տեսակ բան հուզեմ որ էտ մարդը բալքի շինա դրստե, որ ես էտոր գլուխը կռեմ»: Չէ, թագաւոր էտ բան էլ է գտնում:

Ղարազուներ աշում են, որ էլի էն ըխթիար գալում է, համա դատմի օրվա կեղտոտ շորերով չէ, թագաւորի շոր է հագն: Էկավ մոտեցավ թե չէ, էլ օնշով ամոթու մօտ շքնաց, էնոր շորերից էս հեղ ամըցան, բան չհարցուցին, ու հառաջն էլ չէկան:

Ըխթիարը դուռը քշեց, գնաց խնամաթուռ նստավ, թագաւոր զարմանում է որ ըխթիարը դատմի քրշոտ կեղտոտ շորերով էր գալում՝ հետօր էնենց մի դաթ հալավ էր հագնել, որ թագաւորի շորերից է: Խաս էր: Էս անգամ ըխթիար էլ չէր ամչնում թագաւորից, դուռ ու առանց ամչնալու խոսում էր թագաւորի հետ, էլ հընչի էր թագաւորից ամչնում ու վախենում որ, տները թագաւորի տներից լավ, ջաղացը՝ ջաղջից, շորերն էլ թագաւորի շորերից էլ լավ:

— Ա՛յ մարդ, էրկու բան հառաջարկեցի քեզի, էրկուսն էլ տեղով դրստեցիր, մնաց մեկը, թե որ էն մեկն էլ դրստեցիր, քեզի էլ ուրիշ բան չի մնա, էն է, որ պսակի թաբտիր կոնես: Թե որ չը դրստեցիր, գլուխդ կուտամ: Ես քեզնից հուզում եմ, որ էս գիշերվա մեջ դրստես մի հ'էգի, քու տներից ինչունի իմ պալատներ, ամեն տեսակ կանանչ ծառերով, ծաղիկներով զարդրած: Հ'էգու մեկ կողմը ծառերի վրեն հասած թաց մեյվա էղնի, մեկէլ թարավ շոր մեյվաների ամեն տեսակ շարած էղնի, սաղ ճամբեք խալի-խալիչա փռած էղնի, տեսակ տեսակ ծաղիկներ փռած: Հ'էգու վրեն էլ ծածկված էղնի, որ արեւ շիպնի թագաւորի աղջկա վրեն: Ճամբի վրեն սեղան-

ներ շարված էղնին, սեղանների փեշխունների վրեն ամեն տեսակ խմիչքներ ու կերակուրներ հաղը էղնի, յոթ դաթ էլ դահուլ զուռնա ու ամեն տեսակ շալիներ դրստված էղնի, էս թոմրից հետև նոք հարս ու թաղվոր իմ իշխներով ղայդով, շալիով էրթան պսակ ու էն ղայդին հասնին ինչունի ձեր տուն: Թե որ էս բանն էլ դրստեցիր, ղաթի աղշիկս քու հարսն է, թե չէ գլուխդ կը զարնեմ:

Մուրուքուն նոր առավ Միրզա Մահմուտի հորը, էս թոմար հուրտից պտի կարա դրստել: Ընկավ գլուխ կախեց ու դառավ էկավ, թագավորի էս հեղվան հուզածն էլ թոմար պատմեց Միրզա Մահմուտին:

Միրզա Մահմուտի թալաշ չէր, թագավոր ինչ հուզում էր թող հուզեր, էնոր համար դրստելը ղաթին բան չէր:

Մարդ ու կնիկ էլի գիշեր դինշ պարկում քնում են: Միրզա Մահմուտ մատնու ալը պտտցնում է, արաբներ գալում են: Միրզա Մահմուտը թագավորի էս ետի հուզածն էլ ասում է, արաբներ էրթում են շինելու, Միրզա Մահմուտ դինշ պառկում քնում է:

Առավոտուն սաղ քաղաք էս հրաշքներ որ տեսնում են, զարմանում են, բերընները մնում է բաց, իրանց բան ու գործ թողնում, առուտուր, թուքնճիկ իրանց թուքները փակում սեյրի են գալում: էս հրաշքների ձենը սաղ աշխարք ցրվում է: Թագավորն էլ հեննում աշում է, ինչ աշե, մի ղոշա տղման հէգի, աստուծութուն ինչ տեսած ծառ ու ծաղիկ ասես ստեղծեր է էտ հէգու մեշ, մեկ թարավ ծառերից կախված հասած ամեն ջինս մեյվեք: Մեկ թարավ շոր մեյվեք, ճամբեքը սաղ խալի փռած, փեշխուններ դրած, ամեն թավոր խմիչքներ ու եմակներ վրեններ շարած, շալիներ հաղը կայնած շալում են, խաներ ու բեկեր նստած կերուխում են անում, վերե ծածկրված, արե չի դիպնում, թավուր-թավուր դշեր ու բիրուլներ ծառերի վրեն խոսում էին: Միրզա Մահմուտն էլ իր թաբդիբով էկեր կայներ էր: Թագավորի բերան մնացեր էր բաց, հեշ չգիտեր, որ թոմար հազիր են, իրան են աշում:

Թագավորն էլ ներս մտավ, իր աղջկան հագուց, զուքեց խաս-խաս շորերով, ախր գիտեք, թագավորի աղջիկ մոնց շորեր կը հագնի, էնենց էր սիրունցե թագավորի աղջիկը, որ արևից սիրուն էր գառե: Թագավորի պալատն էլ հարսների թաբդիր տեսավ, զարթըրվավ, էկան թագավորի կարգած աղջիկներ ու փեպեք:

Միրզա Մահմուտն էլ իր շորեր հագած իր մի թախում ազարների հետ էկավ թագավորի դուռը կեցավ, հարսին էր բաքլայում: Միրզա Մահմուտի սիրունութունը, էնոր շորերի փեկլալը, քս սաղ

անգին քարերով էր զարթրված, հալղի խելքը տարեր էր: Մեկ էլ ա-
շեցին, թագավոր իր աղջկա ձեռքից բռնած մեկել քուրերի հեա
գուրս էկավ, բերեց իր աղջկա ձեռքը տվեց Միրզա Մահմուտի ձեռ-
քը, օրշնեց իր թագավորական ու հորական բերնով, մեկեն գողաց-
չալղիներ, բաշլայեց քեֆ ու ուրախութուն: Որը պար էր խաղում, որը
ուտում, խմում քեֆ էր անում, որը թազա հասած մեյվա էր ծառե-
րից քաղում ուտում, որն էլ շորը: Ամեն մարդ իր սրտի հուզածն էր
անում:

էտ թումրի մեջ ուրախ շէր մինակ Միրզա Մահմուտը:

էսենց շալղիով, պարով, ուտել խմելով ու քեֆով, խալի խալի-
շաների վրայով թագավորի տնից գացին ինչունի Միրզա Մահմուտի
պալատներ: էս քեֆն ու ուրախութունը, էս հարսնիքը քշեց օխտն օր,
օխտ գիշեր: Օխտն օր որ թմամվ, ամեն մարդ դարձավ իր տուն գնաց,
մնացին Միրզա Մահմուտն իր կնիկ ու հերն ու մերը:

Մարդ ու կնկա ուրախութան էլ ճոթ չկար, ուտում խմում, իրանց
քեֆն էին անում:

Մի վախտ էսենց անցնում է: Միրզա Մահմուտն ու թագավորի
աղջիկ ամեն օր էրթում էին խաս բաղչեն, ման էին դալում իրարու
ձեռք բռնած, բեզրում, դալում մառմառ հավուզի գլխին նստում
դինջանում էին: Թագավորի աղջիկ շատ ուրախ էր, հմա Միրզա
Մահմուտի նիաթներ իսկի շէր բացվում:

Օրմ մառմառ հավուզի գլխին, ծաղկների մեջ նստած, թագա-
վորի աղջիկ կոսե,— Միրզա Մահմուտ, գլխիդ, արևիդ ղուրբան, դու
յաղո՞ւղ ես համեն օր նիաթներդ էտենց կախում, բայլու է, որ իմ
սիրունութան չես հավնում, որ հեչ չես բացվում:

— Ես որ քու սիրունութան չհավնեի, յաղո՞ւղ էի քեզ առնում:
Ես ուրիշ բանի համար եմ նիաթներս կախում: Հեգուց հերդ մի լավ
քեֆ է սարքում: Էնտեղ թոփ պտի էղնին ինչքան որ մեծամեծ մար-
դիկ կան, իր վազիր նազիրներ, ընտեղ գալում են քու էրկու քուրերն
ու իրանց նիշանածներ: Մեզ էլ կհրավիրեն: Քեֆ ու ուրախութունից
հետո պտի ջիրինդ խաղալու հինին, սաղ իրեք օր պտի ջիրինդ խա-
ղան: էս քաղքի մեջ ինչքան որ լավ ջիրինդ խաղացող կա, պտի թոփ
էղնին, հորդ էն էրկու փեսեն էլ, ես էլ հոտ կէղնինք: Դու քու քուրե-
րուդ հետ կը նստիք բատնի վրեն ու մեզի սեյր կոնեք: էտ վախտ ես
իմ ղըլղը փոխում եմ, իմ մոտ երեք հատ հրեղեն ձիու մազ ունիմ՝
մեկը սև, մեկը կարմիր, մեկը ճերմակ: Օրական մեկ մազը կրակ
կտամ մեկ ձի կուզա ես կը հեծնիմ, կը հընկնիմ ջիրինդ խաղացող-
ների մեջ, բաճանաղներիս լավ կը ծեծեմ ու ձիւ կը քշեմ կէրթամ,

դոսդր բաց կը թողնիմ: Երեք օր հիւրուր վրա էսենց կոնհմ: էտ վախտ քուրերդ դլխուդ կուտան ու կոսեն թե. «Դու էլ գիտես մարդ ես առեր, աշո՞ւմ ես մեր մարդիկ, որ սաղ ձիավորներ էնոնց դեմ դողում են», էսենց հա գովում են իրանց նիշանածներին: Դու օնչիլ չասես, ես քեզի թամբիհ եմ անում, ինչ կոսեն թող ասեն, դու ձեն մի հանե, լըլլիմ շիմանամ որ ասես. «էն լավ ձիավորը Միրզա Մահմուտն է», ամա որ ասիր, ես կը դառնամ մի սե ամպ, էրկնքու հերեսից քաշվիմ կերթամ, մեր հարստութունը կէրթա, տներն էլ, հէդին էլ, ամեն բան էլ: Ընդից հետ էլ որ դու հուզենաս ընծի գտնել, պտի հազնիս էրկթե շարուխ, ձեռքդ առնիս էրկթե բիր, ջերդ պտի լցնես կորեկ, էնքան պտի ման գաս իմ հետեհն, ինչունի որ էրկթե հոտնմներգ մաշին, բիրը մաշի, կարճնա, մեկ ձեռք բռնելու տիտ մնա, կորեկն էլ ջերիդ մեջ փթի, հող դառնա, նոր դու կարաս ընծի հասնել: Ամա, որ քուրերդ ինչ որ ասեն դու ձեն չհանես, մենք էն վախտ ջատ բախտավոր կէղնինք: Ամա, կնիկ մարդուն էհդիպար չկա, ես վախե-նում եմ, որ դու ասես, ես էտոր համար էլ չեմ ուրախնում:

Հիւրկուն էր, թագավորի թալալը ճվում էր քաղքի մեջ թե.— Թագավոր լավ ուրախութուն ունի. հացկերութուն պտի էղնի հագուց: Հացկերութունից հետե երեք օր հիւրուր վրա ջիրինդ պետք է խաղան, հոն կ'եղնին թագավորի երեք փեսեն: Էրկու մեծ փեսեն Միրզա Մահմուտի հետ ջիրինդ պտի խաղան, վեմ որ լավ ձի ունի, թագավորի հրամանն է, որ ջիրինդ խաղալու գա: Վեմ որ թագավորի հրաման չ'կատարե էնոր գլուխը կ'էրթա:

Հեդսի առավոտ չալդին չալվում էր, դահուլ զուռնեք փշում էին: Հոլորտի որ պտի հավաքվեին, էկան մարդիկ թոփ էղան, բաշլայեցին հացկերութ ուտել, խմել, քեֆ անել: Քեֆի մեջտեղ նստած էր թագավորն ու Միրզա Մահմուտը, թագավորի մեկել փեսեքն էլ էս կողքին ու էն կողքին էին նստում: Հացկերութուն որ վերջացավ՝ բաշլայեցին ջիրինդ խաղալը:

Թագավորի էրկու մեծ փեսեք իրանց քահլան ձիանու վրեն նըստած քշում էին ըստուր ընտուր հետեհն: Քաղաքի լավ ջիրինդ խաղացողները թոփ էին եղած հոտ:

Միրզա Մահմուտ գողտուց հ'ելավ քաղքից դուրս, կարմիր ձիու մազը վառեց, հրեղեն ձին խրխնջալեն էկավ Միրզա Մահմուտի մոտ կայնավ: Միրզա Մահմուտ ղըլղը փոխեց, հեծավ հրեղեն ձիուն, քշեց մտավ մեյդանը: Զիավորներ ահեկուն թոմար դես ու դեն փախան: Միրզա Մահմուտը իր ձեռքի հաստ բրոզ թագավորի մեկել

փեսեքուն լավմ ծեծեց, ու հայդե դուս պրծավ դիպա դաշտ, ձին թողեց, ինք դառավ էկավ, ինչրիս որ հեշ բանից խարար չէղնի:

Թագավորի երեք աղջիկ, որ բարձր բատնի վրա նստած սեյր էին անում, էրկու մեծ քուրեր բռունցքով տվին պզտիկ քուրոջ գլխուն.— Հողս գլխիդ, դու էլ գիտես թե մարդ ես առե, որ քոշեքն է մտնում, օձը հալքադ պատի ծակ է մտնում, տեսա՞ր մեր մարդիկ ի՞նչ արին, թո՞մրին վռնդեցին:

— Է՛հ, ամեն մարդ իր բախտից ջորվի, աստուծ ընձի էտ օձն էր կամեցեր, փառք իրան:

էտ օր անցավ: Մարդիկ ցրվան, գնացին, ամա թո՞մարն էլ զարմանքով էին խոսում կարմիր ձիավորի վրեն: Հեշ, օնչով չէր հիմանում, թե էտ վով էր:

Հեգսի օր էլի թոփ էղան ջիրինդ խաղացողներ: Թագավորի երեք աղջիկ էլի իրանց աեղ նստած սեյր էին անում: Թոփ էղան մարդիկ, իրանց խաղի ու կեր ու խումի հետն էին, բիրդան Միրզա Մահմուտ կորավ: Գնաց քաղքից դուրս, ճերմակ ձիու մազը վառեց, հրեղեն ձին թամ դրուստ խրխնջալով էկավ Միրզա Մահմուտի մոտ կայնավ: Հեծավ ձին, շորեր փոխեց ու էլի քշեց, մտավ մեյդանը: Ահ ու դող հընկավ թագավորի էրկու փեսի սիրտը: Միրզա Մահմուտ էկավ մտավ մեյդան դես քշեց, դեն քշեց հընկավ թագավորի փեսեքու հետևից իր հաստ բրով լավ ջախ ու փորթ արեց ու թողեց փախավ քաղքից հեկավ, ձին թողեց, էլի էկավ մտավ քեֆ էնողների մեջ:

Մեծ քուրերը էլի բռունցքով տվին պզտիկ քուրոջ գլխուն ու վրեն խնդացին: Միրզա Մահմուտի նիշանածն էլի ձեն շհանեց ու բանմ էլ շասեց:

Սաղ քաղքի մարդիկ, մեծ, պզտիկ, աղքատ, հարուստ, վազիր, նազիր զարմացեր էին էս բանի վրեն:

Քեֆի, ուրախութան և շիրինդ խաղալու էրկօրը անցել էր: Հեգսի առավոտ էլի ամեն օրվա մարդիկ ու քաղքիք թոփ էղան, ամեն մարդ իրա տեղը նստավ, էս ջիրինդը հետի հեղվանն էր: Թագավորի աղջիկներ էլի իրանց տեղն էին նստել: Դահուլ զուռնեն շալում էին: Թագավորի էրկու փեսեն էնքան էին քյոթակ կերել, որ գիշեր ցավից չէին քնած, էլ ամեն օրվա պես քեֆով մեյդան չէին մտնում:

Ջիրինդը սարքեցին: Միրզա Մահմուտն էլ ըսկի քեֆ շուներ, գիտեր, որ կնիկը էտ օր պտի շդիմանա դուզը կոսե քուրերուն: Հեկավ քաղքից դուրս, էս հրեղեն սև ձիու մազը վառեց, սև ձին էկավ, հեծավ, դըլլը փոխեց ու մտավ մեյդանը: Նես տվեց, նեն տվեց, հա-

աւով Թագավորի փեսային: Խեղճերու ծնկները թուլացան որ էլի տեսան հրեղեն ձիավորին: Էս հեղին թոմարն էլ հասկըցան, որ էտ ձիավորը Միրզա Մահմուտն է:

Հրեղեն ձիավորը հասավ, ձեռքի հաստ րորով րաճանագների լերթերուն ամենքուն մի քանիս հ'իշավ:

Թագավորի մեծ աղջիկ դառավ ըսավ իր պզտիկ քուրոջ.— Աշո՞ւմ ես, մարդդ էսենց օր ծակ է ման գալում որ մտնի, դու էլ խնդում ես մեր մարդկանց վրեն, հապա մեկ էն էլ տղամարդու պես գար մեյդանը մտներ, նոր դու կը տեսնեիր:

Պզտիկ քուրոջ համրերութուն էլ շտարավ: Լեզուն շորնար, բալքի շխոսեր: Բիրդան դառավ քուրերուն.— Անզգամներ, չի հմար եք իմ գլխիս տալում, էն սե հրեղեն ձիավորը Միրզա Մահմուտն է, որ էս երեք օր ձեր նիշանածներուն էտ օրը քցեց:

Էս խոսքերը էնենց հերսոտելով որ ասում է, հալը թոմար աշում են էտ սե հրեղեն ձիավորին, Թագավորի աղջիկներն էլ տեսան, որ Միրզա Մահմուտը իր ձիով դառավ սե ամպ ու գնաց ամպերու միջով: Հալը թոմարի էտ սե ամպին էին սեյր անում: Մեկ էլ հետ դառան, որ ըխթարի տներու տեղ ոչ քոշք ու սարայի, ոչ լավ տուն, ոչ հ'էգի, ոչ էլ ջաղաց, էլի մնացեր է ըխթարի ալաշուխը, էլի էն աղքատ, քասիր մարդիկ, նստած անիծում էին սարիբին:

Էս բան որ էղավ, Թագավորի աղջիկ փոշմնավ, ամա էլ ի՞նչ օգուտ, չգնաց հոր տուն: Հագավ սգի սե շորեր ու էկավ նստավ իր կեսուր, կեսարարի մոտ ալաշուխի մեջ ու ամեն օր լալում էր:

Անցնում է էսենց մի քանի օր, Թագավոր գիտե թե աղջիկը Միրզա Մահմուտին հիմի մոռացել է: Կանչում տանում է տուն, որ մի քիչ սիրտը բացվի:

Թագավոր շատ է համոզում աղջկան, որ Միրզա Մահմուտին մոռնա: Տեսնում է, որ ճար չկա, իլլաճ չի էղնում, սոնդ, աղջիկ վերցնում ասում է հոր.— Թե որ դու ընծի հ'ուզում, ունգունում ես, առ ընծի հմար մի ջուխտ էրկթե հ'ոտնման, մի հատ էլ էրկթե բիր, որ ես սաբախտան պտի էրթամ: Ինչունի չ'հասնիմ Միրզա Մահմուտին ես պտի չկայնիմ:

Հ'եգսի առավոտ հոտնամաներն ու բիրը հաղը էր: Թագավորի աղջիկ հագավ հ'ոտնմները, բիրը ձեռն առավ, մի ջերն էլ լիք կորեկ լցեց ու թմրին մնաս բարով ըսեց, էկավ կեսարարի ու կիսրոջ ձեռները պաղեց ու հ'ընկավ ճամբա:

Գնաց, գնաց, շատ գնաց թե քիչ, աստված գիտե, հասավ մի թիրուն շայիր-չիման տեղ: Հեռվեն աշում է, որ էտ շայիր-չիման տեղ

մի սիրուն ճերմակ պատերով տուն է էվերում: Դեմ էրեց էտ տուն
ու գնաց: Գնաց հասավ դուռը, աշեց որ մեկ մարդ նստած էր էտտի:

— Բարև քեզի ամի:

— Աստու բարին, թագավորի աղջիկ, էկար Միրզա Մահմուտին
գտնելու հա:

Թագավորի աղջիկը զարմանում է, որ էտ մարդը իրան ճանչը-
ցավ ու իրանց գործի էղելութունն է գիտե, էլ չի հուզում բան թագ-
ցընել, ասում է.— Ամի ջա՛ն, դու որ ընձի ճանչցար ու մեր էղե-
լութուն էլ գիտես, բայլու է որ դու Միրզա Մահմուտի տեղն էլ գի-
տես, խնդրեմ ասես, աճապ կարա՞մ գտնել, թե չէ:

— Հե՛յ օրթի, Միրզա Մահմուտին էրթալ հասնելը շատ շաթին
է, դու մո՞նց պտի էրթաս ու հասնիս ու էնոր գտնիս:

— Դու տեղն ըսա, ամի ջան, տեղ որ գիտնամ հուրտի էլ որ
էղնի կ'էրթամ, ինչունի որ մեռնիմ, էս տանջանքից ազատիմ:

— Որ էտենց է օրթի, ես քեզի կոսեմ: Միրզա Մահմուտի ճամբի
վրեն երեք հատ դև կա, երեքն էլ հիրուր քուր են ու հիրարուց բա-
ժան են: Հառչին էրկու քուրերը ամենք օխտը տղա ունին: Տղերքը
սաբախտան էրթում են, հիրկուն գալում են տուն: Թե որ դու կա-
բացիր էն վախտը հասնել, որ պզտիկ քուրը նստած հաց է թխում,
հաց թխած վախտ իրան ծծերը հուսերի վրայից քցում է հետև,
էնենց պտի էրթաս, որ էն վախտը հասնիս ու ծծեր հետևեն բերանդ
առնիս ու ծծես, թե որ էտենց կարացիր անել, զաթի քեզի կազատե,
թե որ շարեցիր, քեզի կը բռնե, խորվու կոնե իր տղերանց համար:
Միրզա Մահմուտն էլ էտ դևի մեծ քուրոջ աղջկա հետ նիշան-
վել է, քառսուն օր է մնում, որ հարսնիք անեն, պսակեն:

Թագավորի աղջիկ էս խրատներ առավ ու շնորհակալ էղավ ու
գնաց: էրթում հասնում է պառավ դևի մոտ: էն վախտն է հասնում,
որ դևը շափուկ-շափուկ հաց է թխում: էն մարդու ըսածի պես ծծեր
հուսերի վրայից հետևեն կախ է քցե: Գաղտուկ ուսուկ ուսուկ էրթում,
բիրդան պառվի ծիծը առնում է բերան ու ծծում է:

— Թո՛ղ, օրթի, դու էղար ընձի աղջիկ, հուզե, մուրազդ տամ:

Թողնում է պառավի ծիծը, էրթում է ձեռը պագում է: Ինչքիս
տան աղջիկ բաշլայեց տուն վեր քաղել, ավելել, մաքրել թամուզ-
ցընել: Ամեն բան իր տեղը դրեց: Բանը որ պրծնում է, պառավ դևը
կոսե.— Օրթի դու չէիր վախենում, որ էկար հասար ըստեղ, չէիր
ըսում որ չիմ մեծ կտորս հանկաջս կը թողենք: Ըսե աշեմ քու դար-
դըդ ի՞նչ է, հալբաթ դու մի բան ունիս էս տեղեր:

— Իմ դարդս, էս է քալե ջան, ես դեմս եմ արել էկել քեզ մոտ որ դու ընծի հասցնես Միրզա Մահմուտին:

— Շատ շաթին բան հ'ուզեցիր, օրթի: Միրզա Մահմուտը հիմի իմ մեծ քուրոջ մոտն է, էնոր ձեռն որ հ'ընկար քեզի կտոր-կտոր կոնե: Օրթի, ես օխտը տղա ունիմ, դացել են ավուղուշ, իրկուն դալում են, հ'եդուց տղերքս քեզ կը տանեն ինչունի միջնակ քուրոջս սինոռը ու կը դառնան: Էն էլ օխտը տղա ունի, թե որ ռասթ բերիր էնոր էլ հաց թխած վախտ ծիծը ծծեցիր, էն էլ քեզի կը հասցնե ինչունի մեծ քուրոջս սինոռը, ընտից էլ Միրզա Մահմուտին: Հմիկ քեզի կը պահեմ, տղերքս կգան ես կոսեմ, թե աստուծ ձեզի մեկ քուր է տված, տղերքս կոսեն թե. «Հ'ուր է մեր քուրը, բեր տեսնինք»:

Հ'իրկվան մոտ էր, պառավ դեր տանում աղջկան պահում է: Տգերքը դալում են տուն, հոտ են քաշում:

— Ատե, մեր տնից աղամ օրդու հոտ է դալում, մեր սինոռ մարդ է մտեր, խորվե՞ր ես որ ուտենք:

— Օրթի, աստուծ ձեզի մի քուր տվեց, էն կաթից որ դուք եք կերել, էն էլ է կերե, էղավ ձեզի քուր:

— Որ էտենց է. ատե, բեր մեր քուրոջ տեսնինք:

Պառավը էրթում բերում է թագավորի աղջկան, տղերք հետ բաբում են: Աղջիկ պաղ ջուր բերում աղբրտանց հ'ոտները լվանում է: Դինջանում են, հաց են ուտում, հետո պառվի տգերքը թագավորի աղջկան ասում են:

— Ի՞նչ է քու մուրազդ, հ'ուզե:

— Իմ մուրազս էն է աղբրտիկ, որ դուք ընծի հասցնեք Միրզա Մահմուտին, ուրիշ մուրազ չունիմ:

— Քուր ջան, դու շատ դժար տեղ կապեցիր, հմա ինչ արած, խոսք են տված քեզի, պետք է տանենք, ինչունի մեր մեծ մորքուրի սինոռն ու դառնանք:

Սաբախտան վաղով պառավի էրկու տղեն առնում թագավորի աղջկան տանում են ինչունի իրանց մորքուրի սինոռն ու դառնում գալում են:

Թագավորի աղջիկ էրթում, էրթում աշում է, որ պառավ դեի թունդրի մուխը հ'ելնում է, էն վախտին է հասնում, որ պառավ դեր նստած հաց է թխում, ծծեր հ'ուտերի վրայից քցեր է հետև: Գաղտուկ էրթում է, բիրդան ծիծը առնում է բերան ու ծծում է:

Պառավ դեր ասում է.— Ա՛յ հողածին, բաց թող իմ ծիծս, ես քու մուրազդ կատարեմ, դու էզար ընծի հոգևոր ավլատ:

Աղջիկ թողնում է պառավ դեի ծիծն ու ասում է.— Ես ուրիշ

փափակ շունիմ, իմ մուրազս էն է, որ գու ընծի հասցնես Միրզա Մահմուտի մոտ:

— Թագավորի աղջիկ, էտ շատ դժար տեղ կապեցիր: Միրզա Մահմուտը հիմի իմ մեծ քուրոջ քովն է, էնոր աղջկա հետն էլ նիշանված է: Հ'երսունինը մոլլա զօր ու գիշեր ծառայում են, ես քեզի հմիկ թամբիհ կոնեմ՝ ես օխտ հատ տղա ունիմ, օխտն էլ ավուղուշ են գնացել, հ'իրկուն կուգան, տեսնինք, տղերքս ինչ կոսեն:

Թագավորի աղջիկ հ'ելավ պառավին օգնեց, տուն հ'իստկեց, հացեր վեր քաղեց, բանից պրծան, հ'իրկվան տղերանց գալու վախտըն պառավ դեը տարավ աղջկան պահեց:

Հ'իրկուն տղերք տուն էկան, թե չէ.— Հը՛, ասե, մեր տնից հողածնի հոտ է գալում:

— Հա, օրթի, դուք քուր շունիք, աստուծ ձեզի մե քուր տվեց, էն կաթեն կերավ, որ դուք եք կերած, էղավ ընծի հոգու զավակ:

— Թե որ էտենց է, բեր մեր քուրոջ մենք էլ տեսնինք:

Թագավորի աղջիկ էկավ աղբրտանց ձեռքերը պագեց, պաղ ջուր բերեց հ'ոտնեերնեը լվաց, դինջացան, հաց կերան:

Պառավի տղերք վերցնում, ասում են աղջկան.

— Հուզե, մուրազդ տանք:

Աղջիկն ասում է.— Իմ մուրազն էն է, որ դուք ընծի Միրզա Մահմուտի մոտ հասցնեք:

— Քուր ջան, Միրզա Մահմուտին հասցնելը շատ դժար է, համա ինչըխ անենք, մեր պարտքն է, որ կատարենք, չարեն ինչ, մենք քեզի ինչունի մեր սինոռի գլուխ սաղ-սալամաթ կը տանինք, ընտից էն գին անցնելու իրավունք շունինք, դու դիտես:

Սաբախտան դեերուց էրկուսը հ'ելան, որ աղջկան տանին: Պառավ դեը գալում ասում է աղջկան.— էն վախտ որ էրթում հասնում ես մեծ քուրոջս սինոռին, որ Միրզա Մահմուտն էլ հոն է, էնոնց տան մոտ մի լավ հ'աղթուր կա, վրեն ուռի լավ լավ ծառեր տնկած, կ'էրթաս էն ուռի ծառերի մեջ կը նստես դիս: Միրզա Մահմուտի հ'երսունինը մոլլեք գալում են ջրի, ամեն մեկի ձեռք մի գլուգլում կա, էն մեկին էրկու օսկե գլուգլում, մեկը Միրզա Մահմուտին է: Մոլլային կոսես, թե. ժՏո՛ւր, էս օսկե գլուգլումով մի քիչ ջուր խմեմ, էն կուտա, թե որ Միրզա Մահմուտին նշան կա մոտդ, կը քցես գլուգլումի մեջն ու կը ղրկես: Միրզա Մահմուտը կը ղրկե կը տանի դիս: Թե որ էտենցով կուցիր Միրզա Մահմուտին հասնել կը հասնիս, թե չէ ուրիշ իլլաճ չկա:

Աղջիկը մնաս բարով արեց ու հայտե շտկվան դեպի մեծ քու-

րոշ սինոդը: Գնացին հասան ինչունի մեծ պառավ դևի սինոդն ու ընտելից պառավի տղերքը. աղջկան մնաս բարով արին ու հետ դա-
ռան: Աղջիկը գնաց, գնաց հասավ աղբորին ու կանանչ ուռի ծառերի
տակ նստավ:

Գիշերը էտ կանանչ սիրուն ուռերու տակը մնաց, ինչունի լուս
չքնավ, հազար թավուր բաներ անցավ աղջկա մտքով, բիրդան ձեռը
տարավ ջեր, աշեց, որ լցած կորեկներ փթեր հող էին դառել, աշեց,
որ հոտնմաններն էլ են ծակվեր:

Արեն նոր էր քիչ տաքցեր, թագավորի աղջիկ աշեց որ հեր-
սունուիննը մոլլեն էկան հաղորդից ջուր տանելու, աշեց որ թոմրի
ձեռք մի մի դյուզյում էր, էն մեկին էրկուս, էն մեկն էլ օսկի:

Աղջիկ էտ մոլլային աղաշեց թե.— էս օսկի դյուզյումը տուր քիչ
ջուր խմեմ:

— էս օսկի դյուզյումը Միրզա Մահմուտին է, ես մո՞նց տամ,
որ դու ջուր խմես:

Թագավորի աղջիկ էնքան յալվար հընկավ, ինչունի որ մոլլի
ձեռքից առավ ջուր խմեց ու գողտուկ Միրզա Մահմուտի մատնին,
որ մնացեր էր իր մոտ, հանեց քցեց գյուզյումի մեջ: Մոլլեն առավ
գնաց, աղջիկը մնաց հոտ:

Մոլլեք գնացին տուն: Միրզա Մահմուտ հելավ լվացվելու
լվացվում էր, բիրդան աշեց, որ մատնին գյուզյումի միջեն հընկավ:
Միրզա Մահմուտը ուրախութունից էլ չհիմացավ թե ինչ անե: Կան-
չում է մոլլային ու ասում է.— Դուք իմ էս գյուզյումը հո՞ւմ ձեռն
եք տված, հաղբորի վրեն զարիր մարդ կա՞ր:

— Հրամանք ես, Միրզա Մահմուտ, ընտե մի դարիք մարդ կար,
շատ յալվար էղավ, մենք էլ տվինք ջուր խմեց:

— Դե՛հ, որ էտենց է, չորս հինգ հոգի գացեք, էտ մարդուն հոս
բերեք, ամա էնենց բերեք, որ օնշով չ'տեսնի:

Մոլլաներից մի քանիս շտապոք գնացին առան էտ դարիք մար-
դուն, փաթթեցին, որ օնշով չ'տեսնի, ու բերին Միրզա Մահմուտի
մոտ: Միրզա Մահմուտը շատ ուրախացավ ու էտ մարդուն, որ իրա-
նից դայրի օնշով չէր ճանչնում, բռնեց իր ձիուն մշակ ու թամբիհ
արեց, որ դուս չէլնի:

Անցավ մի քանի օր, Միրզա Մահմուտ էլ էնքան չէր էրթում իր
նիշանածի քով: Շաբթուն մեկ անգամ անջախ էր պատահում: Պա-
ռավ դևը կատղում է, հելնում էրթում է Միրզա Մահմուտի մոտ ու
ասում է.— Միրզա Մահմուտ յաղո՞ւզ, դու հառաջ ամեն օր էիր դա-
լում աղջկաս մոտ ու հիմի շաբաթ մի հեղ էլ չես գալում, էտ քեզի

ինչ ձեռք տվեց: Ինչը իս որ էս թաղա ձիապահը բռնեցիր, իմ աղջկա մոտից պաղար, դու սաբր արա, տես թե ես ինչ կբերեմ քու ձիապահի գլխուն:

էտ պառավ դեր, հիցսուն հատ դեղա էր պահում: Մի վախտ էտ դեղեք ծարավ էին, մի օր դալում կանչում է Միրզա Մահմուտի ձիապահին ու ասում է.

— Էս դեղեք կը տանիս դեռ էն հանդը կը կայնեցնես, էս քուղով էլ էնքան հառվից ջուր կը կրես խմեցնես ինչունի որ կուշտ խմեն, ես կը հելնիմ հերթիկը կաշեմ. հիրկուն դեղեք որ ծառավ էկան՝ քու մեծ կտոր քու հանկաջը կը թողեմ.— Պառավը հերոստ էտ թամբիհը տվեց ու գնաց:

Միրզա Մահմուտ կանչեց ձիապահին, որ իր հառջի նիշանածն էր, թաղավորի աղջիկ ու ասաց.— Դու մի քուղով հիցսուն դեղա չես կարա ջրել հանդում: Դեղեք կը տանիս հանդ, կը կայնեցնես ու դու կէրթաս գետի մոտ ու կոսես. «Ջրեր, Միրզա Մահմուտը մեռել է, արեք էրթանք լողացնենք» ու դու հառաջ կը հընդնիս, կը վազես, ջրերն էլ քու հետեից կը վազեն: Որ ջրիւր պրծար, կոսես. «Ջրեր հերիք է, դառեք ձեր տեղ Միրզա Մահմուտին լողացուցինք պրծանք», ջրերը դառնում էրթում են, դու դեղեք առ արի տուն:

Առավոտ վաղով թաղավորի աղջիկ պառավ դեղի դեղեք խառնեց հառաջ մի քուղա էլ առավ ու քեց գնաց հանդը: Դեղեք կայնեցուց, գնաց գետի մոտ, ինչը իս որ Միրզա Մահմուտ իրան խրատ էր տված, էնենց էլ ըսավ ու հընկավ ջրի հառաջ վազեց, ջուրն էլ իր հետեից: Էկան հասան գեղեքուն, դեղեքը խմեցին, կշտացան:

Թաղավորի աղջիկ ըսեց.— Ջրեր, ձեր տեղ դառեք, Միրզա Մահմուտին լողացուցինք պրծանք:— Ջրերը դառան իրանց տեղը գնացին:

Թաղավորի աղջիկ դեղեք խառնեց հառաջ, քեց էկավ տուն: Պառավը վազեց մի քուղա ջուր բերեց, էս դեղի հառաջ դրեց, էն դեղի հառաջ դրեց, հեշ մեկը չը խմեց:

Պառավ կատղած դառնում Միրզա Մահմուտին ասում է.— Էս թոմար քու սորվեցրածն է, թե որ դու չէղնեիր, էտ մարդ չէր կարա դեղեք ջրել, դու պտի էլ քու ձիապահի հետ չը խոսիս:— Միրզա Մահմուտը երգում է անում շխոսելու:

Պառավ դառնում թաղավորի աղջկան ասում է.— Հեգուց էրկու դեղա կառնես կէրթաս էն դիմացի էվերող սարը, էրկու բեռ դշի բրմբուլ կը լցնես կը բերես, որ իմ աղջկա յորդան դռակ բմբուլից լցնեմ:

Հիրկուն որ գալում պարկում են, Միրզա Մահմուտ իրան-իրան

ասում է. «Ես որ էղնիմ էն սարին բմբուլ թոփ էնող կոսեմ՝ ղշեր թոփ էղեք, էկեք, Միրզա Մահմուտը մեռել է, էնոր հոգու հացը կտանք, որ էկան թե չէ, ես կը բաշլայեմ իմ մաղերս պոկել, ղշերն էլ հ'աչք կուտան ընձի, իրանց բմբուլներ կը թափեն, ես թոփ կոնեմ կը բերեմ»:

Թագավորի աղջիկ հասկնում է, որ Միրզա Մահմուտ իրան է ասում: Հ'եղնում սարախտան թեզ առնում է էրկու դեմա, քշում էրթում է էն դիմացի սարը: Հասնում է ընդի, գիլ ձենով ճվում է.— Ղշեր, Միրզա Մահմուտ մեռել է, թոփ էղեք արեք էնոր հոգու հացը տանք:— Մեկ էլ աշում է, որ աշխրթի ճոթերից ինչքան որ ղուշ կա թոփ էղան էկան: Թագավորի աղջիկ բաշլայեց մաղերը պոկել, ղշերն էլ թոմար իրանց բմբուլներ պոկեցին թափին: Թագավորի աղջիկ տեսավ որ բեռներից էլ հ'ավել էղավ, դառնում ասում է.— Ղշեր, հերիք է լաք ու տրորվիք, դառեք ձեր տեղեր դացեք:— Ղշերը ցըրվում էրթում են, աղջիկն էլ թոփ է անում, էրկու բեռ թմում է, բառնում քշում գալում է տուն:

Պառավ էս անգամ էլ ավելի կատղում ու Միրզա Մահմուտին ասում է.— էս թոմար դու ես սորվեցնում, էս հեղ երթում արա քու արևով, որ չխոսես, թե չէ քու գլուխդ էլ կը կռեմ:

Միրզա Մահմուտ երթում արեց իր արևով, որ չխոսի մշկի հետ:

Պառավ թողեց, էլի դառավ մշկի վրեն.— Սաբախտան թեզ կ'էրթաս քրոջ տանից կառնես դահուլը կը բերես, որ Միրզա Մահմուտի հարսնիքը անես, թե չբերիր գլուխդ կը կռեմ:— Հսում ու պառավը դու է հ'եղնում էրթում:

Հ'իրկուն որ ամեն մարդիկ պառկան քնան, Միրզա Մահմուտն էլ թագավորի աղջկա հետ պառկան քնելու: Միրզա Մահմուտը էս հեզ մոտ պառկած կատվի հետ էր խոսում:

— Կատու, դու լավ հ'անկաշ դի, թե քեղի ես ի՞նչ եմ ասում, կատու, դիտե՛ս, պառավ քեզի հ'ուր է ճամբում: Քեզի ճամբում է քուրոշ մոտ, որ քեզի ուտե: Հիմի դու աշե, թե ես քեզի ինչ եմ ասում. սաբախտան որ էս կողմից էրթում ես հ'առաջ քեզի ռաստ է գալում մեկ կապած ասլան ու մեկ ղոշ, մեկ ճամբու էս կողմ, մեկ էն կողմ: Դմակ դրած է ղոշի հ'առաջ, խոտը՝ ասլանին, դու կը փոխես, դմակ կը դնես ասլանի հ'առջև, խոտը՝ ղոշին: Ընդից անցնում ես էրթում տեսնում ես որ ճամբու վրեն քցած է էրկու քեշա, փռածները կը վերցնես կը դնես էն կողմ, վերուցածները կը փռես ու կանցնիս: Ընտից կերթաս կը հասնիս իրան ղան մոտ, կաշես որ էրկու դուռ, մեկը վաղուց բաց է, մեկն էլ դրած է: էն դրածը դու կը բանաս, բացը կը

դնես, կէրթաս կաշես, որ ինք նստած է, կը բարեհաս. էն քեզի կոսե. «Զի՞ հմար ես էկեր», դու կոսես թե. «Քուրդ ընձի ղրկեց, որ դհուլը տանիմ, Միրզա Մահմուտի հարսնիքն անես», էն քեզի կոսե. «Նստի մի ձվածեղ անեմ կեր», հ'ելնում է ձվածեղը անում, բերում դնում է քու հ'առչե, քեզ կոսե. «Դու կեր ինչունի իմ դալը», ինքը դուս է հ'ելնում, հ'ակոբքը սրելու, որ դա քեզի ուտե: էն որ դուս է հ'ելնում, դու թող ձվածեղը, կախած տեղից դհուլն առ ու փախի: էն քու հետեից կը ճվա, թե. «Բռնե՞ք հա, բռնե՞ք», շէղնի թե դու խտ դառնաս, քեզ էլ օնշով լի բռնեք, թե որ էտ թոմարն անես, կատո՞ւ, լավ լսեցի՞ր իմ ըսածներ, քեզ տեսնիմ, թոմար իր տեղին կոնես, չ'վախենաս:

Թաղավորի աղջիկ էս թոմարը լավ լսեց ու սաբախտան վաղով հ'ելավ հ'ընկավ ճամբա դնաց:

էրթում հասնում է ասլնի ու ղոշին մոտ, Միրզա Մահմուտի թամբի հերածի պես խոտը վերցնում դնում է ղոշի հ'առչե, դմակը ասլնին ու անցնում ընդից էրթում է քեչաների մոտ, դետնի փածը թոփ է անում ու մեկելը բերում փռում է: Ընդից էլ անցնում էրթում է դռների մոտ, բացած դուռը դնում է, դրածը բաց է անում, էրթում ներս է մտնում, որ պառավ մենակ նստած է ու դհուլն էլ պատից կախած է:

— Բարե քեզ, քալե:

— Աստու բարին, դու բարով էկար: էտ վով քեզի ղրկեց ըստե, չի՞ հմար ես էկել:

— Ընձի մեծ քուրդ ղրկեց, դհուլը տանիմ, որ իրա աղջկա հարսնիքը անե:

— Նստիր, որ էտենց է մի ձվածեղ էփեմ, մի թիքա հաց կեր, հ'ետե տար:

Պառավ դու հ'ելավ ձվածեղ արեց, բերեց դրեց թաղավորի աղջրկա մոտ ու ըսավ.— Դու հացդ կեր ինչունի իմ դալը:

Պառավը դուս է հ'ելնում թե չէ, աղջիկ հացը թողնում, առնում է դհուլն ու հայդե փախնում է:

Պառավ հետեից մազերը պոռչկում է ու ճվում.— Դռնե՛ր, բռնե՛ք, որ տարավ:

— Մենք յաղո՞ւզ ենք բռնում որ, էս քանի տարի մեկս դրած, մեկս հ'ոտած վրեն կայնելով բեզրել էինք, էս մարդ էկավ դրածը բացեց, բացը դրեց:

— Քեչե՛ք, դուք բռնեք, տարա՛վ:

— Մենք յաղո՞ւղ ենք բռնում որ, մեկս դետին էինք մաշեր, մեկս կայնելով բեզրեր, էս մարդը էկավ, մեզի փոխեց:

— Ասլան, զոչ դուք բռնեք, իլլաճը ձեզի մնաց, դուք դիտեք, դհուլը տարավ:

— Մենք չի՞ հմար ենք բռնում, դե՛, քանի վախտ է, որ խոտը իմ հոռչեն էր դրած, դմակը դռչին, էրկուսս էլ կայներ աւում էինք անոթի փորով, հմիկ, էս մարդ էկավ փոխեց, մենք մեր փորը կըշտացուցինք, էլ յաղո՞ւղ ենք էսենց բարի մարդու բռնում:

էսենցով, օնչով շրոնեց, թագավորի աղջիկ առավ դհուլ, բերավ տվավ պառավին: Պառավը տեսավ որ դհուլն էլ էկավ, էլ ի՞նչ կարար անել: Դառավ Միրզա Մահմուտին ըսավ որ.— Թարդիր տես, որ հէդուց պտի պսակվիս, քառսուն օր թմամ:

Սաբախտան պառավ դէր լավ թարդիր էր տեսած, թոմար մարդիկ հագվեր էին հարսնիքի ջորեր, զուգվեր էին, պետք էր պառվի աղջիկն ու Միրզա Մահմուտը պսակվեին, դհուլ զուռնեն չալվում էր:

Պառավը հոռչում էր, որ թագավորի աղջկան կորցնե մի հալով: Էտոր հմար բերում տաս հատ կերոն մոմ կպցնում է թագավորի աղջկա մատներին ու թամբիհ է անում, որ ձեռներ ժած շտա, ինչունի տակ վառին մոմեր, օնչով պտի ձեռք շտա:

Տարան պսակեցին բերին: Պառավ տարավ հարս ու թաղվորին մի ջոկ օթախ դրեց ու թամբիհ արեց, որ քառսուն օր, զօր ու զիշեր դուրս չհընին, ու էնոնց քովն էլ մարդ չպտի էրթա, հաց ու ջուր հերթկեն տան:

Թագավորի աղջիկ էնոնց մոտ մնաց կանգնած, մատների մոմեր վառին՝ Միրզա Մահմուտն ու իր աղջիկը ուրախանան, ու մեկ էլ որ մոմերը հատնելուց հետե բռնե թագավորի աղջկան վառե:

Պառավը էտենցով էլ չկարաց թագավորի աղջկան բան անել:

Հիրիկուն, որ թոմար քնան, Միրզա Մահմուտ հըլավ, թագավորի աղջկա մատների վրայից մոմերը պոկեց, բերեց պառավի աղջկան կոխեց օջախը, նավթ լցեց վրեն ու վառեց: Ինքը առավ թագավորի աղջկան ու պարկավ:

էսենց մի քանի օր անցնում է, մի օր էլ Միրզա Մահմուտ հըլնում դիշեր բանում է գուռը, առնում է թագավորի աղջկան ու հայդե դիպա իր հոր տուն:

Միրզա Մահմուտ թող իրա ճամբեն էրթա, մենք դառնանք մեր պառավ դէին:

Սաբախտան պառվի մշկներ, որ հաց են տանում Միրզա Մահ-

մուտին, աշում են որ, ինչ աշեն, մարդ չկա, Միւլա Մահմուտն էլ թագավորի աղջիկն էլ չկան։ Դառնում դալում պառավին ասում են տեսածները։

Պառավն էլ դալում աշում է, որ մարդ չկա, մոմերը հոտ թափած, ինքն իրան ըսում է պառավը. «Աճար Միրզա Մահմուտ իմ աղջիկս է՞լ է փախցրել»։ Դառավ աշեց օջիւի մեջ, ոչ մեկին վառել են։ Պառավ հասկցավ, որ իր աղջկան են վառել։ Պառավ կատղավ, էլ չէր հիմանում թե ինչը իսկա՛ն։

Պառավ իրեք տղա էլ ունեւ։ Կանչում է մեկ տղին ու ասում է.— Հասիր Միրզա Մահմուտի հ'ետե՛ն, բռնիր կտոր, կտոր էրա ու մեկ կտոր էլ ընձի բեր, որ ես ուտեմ սիրտս հովնա։

Պառվի տղեն մի ամպ էղավ ու թռավ։

Միրզա Մահմուտ դիտեւ, որ իր հ'ետեւից պտի գան։ Մեկ էլ հետ դառավ աշեց, որ մի սև ամպ դալում է։ Հասկցավ, հիշավ զետին, թագավորի աղջկան էրեց նախիր, ինքն էլ էղավ նախրորդ ու նստավ մի սարի վրա։ Պառավի տղեն դալում հարցնում է.— Աղբեր դու ըստեղ ես, մե կնիկ մե մարդ ըստից շանցա՞վ։

— Ծս ի՞նչ գիտեմ, որ դու ընձի հարցնում ես, էս էղավ քանի տարի ես ըստեղ մարդու հ'երես չեմ տեսած։

Պառավի տղեն դառավ գնաց տուն, մորն ըսաց.— Ծս օնչով չգտա, ընձի մի նախրարած ռաստ էկավ, որ իր նախիրն էր պահում, էնոր հարցրի, էն էլ ըսավ որ. «Ծս էս տեղեր մարդ չեմ տեսած», ես էլ թողի դառա էկա։

Պառավ հերոտում ասում է.— Ընթա էն նախրարածը Միրզա Մահմուտն էր, դու չես հասկցեր։

Կանչեց մեծ տղին ու ըսավ.— Շուտ, գնա հասիր Միրզա Մահմուտին, հ'ուրտի որ հասար կտոր, կտոր կոնես, մի թիքա էլ ընձի կ'բերես, որ ուտեմ սիրտս հովնա։

Մեծ տղեն հ'ելավ, հավատա, ամպերի միջով ու գնաց։

Միրզա Մահմուտն էլ, որ պառվի տղեն հետ դառավ հ'ինք էլի առավ թագավորի աղջկան ու գնաց։

Միրզա Մահմուտ մեկ էլ որ հետ դառավ աշեց, որ մեկ էլի ամպերի միջով գալում է։ էս հեղ թագավորի աղջկան դառուց մի հասած ցոլնի հ'արտ, քաղվորներ լցված մեջ քաղում էին։

Պառվի մեծ տղեն հ'իշավ հարցուց թե.— Աղբեր, դուք ըստե հ'արտ եք քաղում, մի մարդ մի կնիկ ըստից շանցա՞ն։

— Աղբեր, էս քանի օր է, որ մենք ըստե հ'արտ ենք քաղում, մարդու հ'երես չենք տեսած, ան հա՛, քեզի որ տեսանք։

Պառավի աղեն էլի թողեց, ընտից դառավ գնաց:

Պառավ գալում հարցնում է թե.—Ի՞նչ արիր, սպաննեցի՞ր Միր-
զա Մահմուտին:

Տղեն ասում է.— Ես օնշովի շտեպա, ընձի ռաստ էկավ մի մարդ,
որ քաղվորներ լցած հարտ էր քաղում: Էն մարդուն հարցուցի, էն
մարդ ըսավ. «Ես էս քանի օր հարտ եմ քաղում օնշովի շեմ տեսած»,
ես էլ դառա էկա:

Միրզա Մահմուտ էլի առավ թագավորի աղջկան ու գնաց: Ծամ-
բեն ըսում է թագավորի աղջկան.— էս անգամ պառավ ինքն է գա-
լում, աշենք թե մո՞նց պրծնենք պառվի ձեռից:

Պառավն էլի կատղավ, տղին հերստտավ.— Ախր էն հարտվորը
ինքը Միրզա Մահմուտն է, քեզի խաբեր է: Ես օր շերթամ բոշ է, դուք
էնոր հախից չեք կարա գալ:

Պառավը դառավ փոթոթորեկ, հ'ելավ էնքան բարձր որ վերեկից
հիջնի ու էրկսին էլ կտոր կտոր էնե:

Միրզա Մահմուտ տեսավ որ պառավ փոթոթորեկի պես սև ամ-
պերու միջով գալում է, աշեց, որ էլ իլլաճ չկա, թագավորի աղջկան
գառուց մեկ փշոտ ծառ, ինքն էլ դառավ մի վիշապ օձ ու հ'ելավ ծա-
ռի ծերին նստավ:

Պառավ հիշավ ծառի տակ ու կատղած ճվաց.— Անամոթ Միր-
զա Մահմուտ, դու իմ օշախս քանդեցիր, իմ աղջկան կերար ու թողիր
փախար էկար: Հիմի էլ հ'ելեր ես փշոտ ծառի ծեր, որ իմ ձեռնեն
ազատվիս, յավաշ տես թե ինչ կոնեմ քու դիտուդ:

Պառավ կատղած կռացավ, որ գետնից մի քար վերցնի վիշա-
պին զարնե, էն կռանալու հետ վերեկից վիշապ զարկեց պառվու ծո-
ծրեկից ծակեց ու գետին քցեց: Պառավ հ'ընկավ սատկավ:

Նոր Միրզա Մահմուտը աստծուն փառք տվեց, առավ թագա-
վորի աղջկան ու գնաց:

Էրթում հասնում են թագավորի քաղքին: Միրզա Մահմուտի ըխ-
թիար հեր ու մերը էլի ժողովք անելով էին ապրում: Ամեն օր հի-
կուն գալում լալում էին իրանց տղի ու հարսի հմար: Թագավորն էլ
ամեն օր լալում էր իր աղջկա ու փեսի հմար:

Միրզա Մահմուտ, որ հասնում է քաղքի մոտ, ռաստ գալողներից
հարցնում է թագավորի ու իր հորն ու մորը, թե հալա սաղ են թե
չէ՞ն. որ հիմանում են թե հալա սաղ են, շատ են ուրախում:

Խաբար էրթում հասնում է թագավորին թե. «Վալլահը չես աս-
ում Միրզա Մահմուտն ու քու աղջիկը էկան»: Ըխթիարին ու իր կրն-
կան էլ են խաբար տալում թե. «Քու տղեն ու հարսը էկան»: Սաղ քա-

զաք թունդ հ'ելավ ու գնաց հ'առաջ: Թագավորը, ըխթիարն ու կնիկ էլ չէին բաժնվում հարսից ու տղից, առել էին իրանց գիրկն ու լալում էին:

Միրզա Մահմուտն ու թագավորի աղջիկ դյուզ գնացին ըխթիարի ալաշուխը: Թագավոր ինչքան յալվար հ'ընկավ, որ էրթան իր պալատը, իլլաճ չէղավ:

Գիշերը Միրզա Մահմուտ էլի պտտցուց մատնու հակը: Էրկոռարարը էկան կայնան:

— Շինե'նք, թե քանդե'նք:

— Ձեզնից հ'ուզում եմ, որ իմ հ'առջի պատրաստած ջաղացը, տները, հ'էգին, ամեն բան իր տեղին, հ'ավալքվանեն լավ եմ հ'ուզում ձեզնից, ինչունի առավոտ:

Արարներ գնացին ամեն բան դրստեցին: Առավոտ էլի սաղ քաղթի մարդիկ զարմանում էին, թե էլի էս հ'որ էղավ, որ էն քասիրի ալաշուխի տեղ էլի հ'ավալքվա տներ շինվան:

Միրզա Մահմուտ էլի լավ հացկերութուն սարքեց: Կանչեց թագավորին, իր աղջկներին ու փեսեքուն, վազիր, նազիրներին, սաղ քաղթի հարուստ երեւի իշխաններին, ինչունի հ'իրիկուն կէրան խմեցին, ամեն մարդ հ'ելավ, շնորհակալ էղավ ու գնաց իր տուն:

Ընդից հ'ետե ըխթիարն ու իր պառավ կնիկը մի քանի տարի էլ լավ, ուրախ, ապրան ու պատվով մեռան, Միրզա Մահմուտ տարավ թաղեց: Ընտից հ'ետե Միրզա Մահմուտն ու իր կնիկը էրեխաներ ունեցան: Ուրախ ապրում էին, մարդիկ գալում ու ուրախանում էին, որ տեսնում էին Միրզա Մահմուտին ու իր կնկան:

էնոնք հասան իրանց մուրազին, դուք էլ հասնիք ձեր մուրազին:

